

JUTÍ ÂENSTIK NUGKA SUJÍTKACHUNUM MATSAMSAWÁITJI

Julián Taish Maanchi

Jutí âents ainautik nágkamchakuik nugka agkannum matsamsau ainajî, ¡chaj! jêga múun jêgamka, aja ajami âjâk âjâkmaka tajimat, tagku ainau tagkumjúmka, ñawâ tsakapaka kuntin egaka yuwaku, nunú ñawêtaku namakash nijâ pegkaká ukusa ijui yamiska yúu, namajka yúu awajmátâi áyi. Nuiqtushkam nuwâ bukintin ñañakûi juti aishmagtishkam ñañáku; kugkuk, achu ainau chigkajkamú mukin tújugkú ashíi iju dautua yúu, yamiska yúu wajaku pãan jamamtuchu matsamtâi ayi nugka sujítkachunum matsatu asa.

Nugka puju-pujujam âjâk âjâmash shíj tsapachkûi, ñujumkash katsujman nejêu, tagkuchish jínu, kuntin egasa yumainush tupákûi, entsa nijâsa yumainush yupiak, jfuch tsupijmmainush tupákûi, jêga jêgamain dukash tupagkí wajakmatâi. Tikich nugka wekaetusa pegkej diisa nuni tagku jijmaku nugkash wekaetusmawai.

Tikich nugka wekaetakuish ína asaukajig kajimátchatîa, tuke ukuaku núnnistaña, yaja nugkanum pujusaish kuntin yupichu mantumsa yúu, âjâkash pegkej tsapau wainká ukukiutik wakétjûki takajmatîa. Asauk numi kampunkamunmash uyai âjâka ukukmau ñunchi-ñunchitjû wajakiu nejekú nunú yúwaku tájmnaekuish tajmnaetâña. Nuní matsamsamu âig, yamai apachi pujutâijâi utsunijâ matsamsa jutí yachiuchijjâig nugka tesajnaika sujitnayaku manitú matsatji, ñaunchuk jutí múuntash jutík matsamsashmau umiaku, nuninaku ñaunchuk matsamiaj nusha ina-inayá matsamsaji. Ñaunchuk jutífk-jutífk matsamiaj nuwik apachjâish jutí nugke akasmataku sênchi manitkamui, atak íi uchijjish ânenjâkats matsamsatin atinme tusa.

Imatjûka ayamjû ajakmau âig, yamai uchi papichin aujsawaitjai tuwinau, chicham epegkea maánitash maánitsuk tútupnik chicham epegkea matsamsami tuwinakjâi inai-inaitam yamai shiwaj depetmainuk minina, jutikam ataña tusa jutí shiwajtik apachjâish chichamak apakaik chichákchawaitji.

Yamai uchi chichamnash antuinawak juninak íntaik uchish múunta chichamenak antukchau ainawai. Múun aújmatâk túajame, ñaunchkek jutí múujâi Nugkui jutí âets nujantai waitu matsamtâi wantíntuk nawanjî susam jukí apujus, yutain untsukmatâi yúu matsátmaun,

Uchi yájauch itajâk matsamas Nugkui chichajainak îwanch untsukta tama, Núgkui chichak atsa "iwanchik ishamaina, wakettanash

waámak waketsa” tusa tuinamuitak -untsukta íish wainkatajtaji tusa wai-waitkam, Nugkui chichak jwâjî íwanchik kaúnkâ!, tima íwanchakam jêga tanishjinig atút-tút, jünmag ekét-két, ishamain wajatâi uchi sapijmainak jâwankita, wamak âwagkita! Tusa imatjam Nugkuishakam jwâjî íwanchik waketjâ!, tamash waketainachu, nunitai waámak âwâagkita tama - wiika juwi íwanchik wáamak waketsa timajîme takug -jwâjî íwanchik waketjâ! -tusa tamash íwanchik waketsaya tuajame nunitai, uchi sapijmainak jwáamak âwââgkikia taja! takug yukû jûjâkug jînum sûjût yukunkaya tuajame, dutikam Nugkuishkam jwî...!! takug jûchijinak kutsá-kutsákûa jêga esajin wakau nunik ekemas:

jKegku kekgúuu jûjûiita dukujuna múun duseji yúwaaamnum!, tama kekgushkam kâuu-kâuu-kâuu-kâuu, takug wîjîak jukitakama eweteu. Nunitai ashí âjâk tsanimpak tsanim-tsaním, paampak winchú, ínchig inchiínchi, ajak dupák patamsaya tuajame, nunitai nuwâ wainak ajanum wégajai tusa wéu wagkag juniawa takug wakitki tupi-tupikakûa jêga takamá, Nugkui nuwâuchik, juega esajin ekemas jKegku kekgúuu jûjûiita dukujuna múun duseji yúwaaamnum!, túu eketun kâuu-kâuu-kâuu-kâuu tusa wîjîak júj takiu tuajame. Nunitâi nuwâshkam kanampa juwakug pisu-pisu kûwât, pisu-pisu kûwât amainagtajkamá, amainagtajkama, emam Nugkuishkam túût ikima ikîin uchía imanun najana egkekíu. Dutikamun jukî apujus ñujûmak untsuktá tama j mama supichkiri!, tuyi tuajame, tama mama supich tuntujkasûa túwâu, nunitai paampash untsuktá tamashkam j paampa champiachkiri!, tama paampashkam chanaj túwâya tuajame, nunitâi kajejúk -túu untsu ekeemtsuk jshîj untsukia taja! takug tugket âjîam paat ináak tagket pujak bukuit numpijnum egkemkau tuajame, nunikmatâi âjum tsâwâinak ikinak túût tsawagkia tusa múun aujmatin âjami (Duwik múun aujmatsamu).

Juna taja junak wainka chichakchmaun ujatsjime, jutik chicham emesjâmunum Nugkui jutí áentsjâish tupannaijâwai nunikmaunum kuwashat nujan tepeuwai. Jumamtin juti múunti chichaku apachik nugka pegkeja wainkag kakajúts ukutsa tamawaitak apachin ipa itái-itáinakûi yamai yupichu jijá ishimainuk matsama minína jutikam atatji tusa chicham étsejmaunak jutí uchish antukchau ainawai, nuninak kakakan chichakaj nugkanash ayamjúkchatin íjúnjâ matsama kajejam yujáji.

Uchita jûjûna takun, ñáunchuk matsamiaj nunú waketjûki nunisaik matsamsami tusankesh tatsujai, ayatak etsegîai îina nugkesh itujsaik ayamjûkaj, nuniaku jutí âents wêgantutik-wêgantutik nugka matsamjûka îina múunjîsh wajúk chichakag matsamsaush ainawa nunisa waitkanitsuk nugka matsamjumji, nuniâjin apach âents ainaush íi nugkeén pujuinaush jutí chicham jitia pujamun antúku atinme, wajuk íish chichakaik matsamsaush ainajî nunisag tusa taji. Jutí túke jêennaitku tikich chichakti túmait sui, numamtin íish chichaka pujumain âig, tkich najasa chichajtâi matsátji. Apachik ñáunchuk nagkamas jutí múunjînak nugka atantuinak waitka ajukú ainawai áantsag yamaikish jutí nugkan matsantuawaj dfitatskaita tuke nugkentin tumain depetkachmin chichainawai.

Yamaik jutí uchi ainauch apachi chichamesh shíj antuinawai, wají waimataitkuish waimakajê. Ñaunchuk uchití âjâmiaj nuka jintâa wekaesa waímakaish, îina patañí pempeentuki tutit awajkatasa waímashtaña, beset ematajtakuish jutí múunjîjâi chicham umika besetash ematai ayi. Amesh numamtin papi aujsau ainaujâi ijúnjam chicham umikam múunjum ayamjumainítme. Ame papinum waímam nuka shiwáj pataimin waitkainakui ayamjûktasam unuimame, wainkam ajûmaish unuimajuítikum pataim pempeéntukim apachjâi beték waitkastin aipa. Ñaunchuk 1915? Ayatai nunu wampustin jutí âentsun apach waitkau âjâbi tuajame namak kucha tutai îñâka âwí, yamai Diip taji nuna tsumuchijin Kumisario entsa tutai awai, nuwí suntaja apujî Kumisarium pujúyi tuajame.

Núwi pujús jutí múutan, nuwêuchijin achijuk dijijû etam, jutí múun tuntúgkusnumia, Dipîa, Majanunmaña, senepîa âatash múun Shunta ayi tuajame inia nuwan Wampis bisátkama jukimu kanus akinau tinu ajme nunú datsamea Diip wakâ dateman pujújû múun, Nañashun, Mañak, Sukut, Bikayu Tukup, âátus ipâma apach waitkajkam chichaman umijûk Kumisariun nagkí mau ainawai. Núwi nagkamas apachjâig shiwajmaekau ainawai. Nunik matsatu jacha, machit, kuchí ainau amuetâi juti múun chichainak dekas atak apachjâi chicham apakmi tusaj, uwej amum kanu awak umikaj shiyaku ainawai majanu nujinchin wawa chikaku tutâi yamai "Bagua Chica" tuwina nuwí utsanatasaj wéenak. Chinchíp mamak îñákmaunum wakattak kanu matsainak kukaj jîinkiaj muja kâjajûk ayamun amakaj wée-wéenakua utsanawaju makichik apach aja takáak pujamunum. Nunik waínkaj jutí âentschakam atash jigkamun ináktuinak untsuinawu ¡kumpaaa...!, ¡kumpaaa...! tama apach âimak

jatsa...!, jatsa...! takug tupikaki jêga wetai kuwichkin utak wegawai tusa îjûnai, aseru takaku jîinki nugka tuntujût tikishmasag ¡paaaa...!, âents ejapena wajaun tutujût túpuj, ¡paaa!, tutujût túpuj âjûtai, ¡amupaji, amupaji! takujag pujut ñumpunak shimai, imachik asa kurnitinak ¡tu-tutu-tu-tuuuu! Umpuinai, nuniâ ñawâ sâak tuajame nuna dapampayi tuajame ¡jau, jau, jau, jau! Wajatâi apachmij Antunium tinu âjâmi nunú chichak ¡uchita kakajtajum, aishmag wajastajum apach amupaji, peg kakajtajum ñawâ minakûish numí awattajum! takug tupika wekamá numí anentâi tepettaman júu takiu, nuwi ñawâ minitam pujût awatí maa ajûan aepeak tupikáyi tuajame. Nuniâi tikich âents ainauk numinum wakiun ñawâ ejeñi jiyatai kâjênak pujûtmitkayi tuajame. Nunik patañi amutkam apachmij Antuniuk êwemkjâu, nunik wakitki Diip tâjâ ¡apach, apach! amupake tusa, nuwî múun Antuniu wâjantak ashí namakan wekaetus chichaman umijúk apachin amukú ainawai (Bikayu Shunta). (dakumkami apach nagkí amuamu)

Jutík ñina múunjî maniwaj apachin waintsuk pujamun, nagkamchak Tirikus, Datikirijâi (Trigoso y Reategui), wakaya tinu ajami Dîip, nunik Tirikusak inia nuwan Tsuntsumchin jukî pujusui Dîip îñakui nuna tsumujin yamai ideal tuwinawai nuwi.

Nujai chichas pajamunum, nuwi wâjâuwai Múun Alfonso Benzus Arévalo, nuwejâi Guillermina dos Santos, Roldan Torres Sánchez, nuigtu nuna yachi tikich âentsnum akiamu Alcibiades nuigtu Manuel del Aguila Grandez, âatus Dîipa anui matsamas dita uchijin jintintuatnun chichamjûkaj Dîipa nuwi papi aujtâin ûjâinu ainawai 1946 wampustin. Dutikajtâi múun Benzúschakam nûshkam chichamjúk kanampa nuwi ûjâinui dutikak ñina nuwen Guellerminan apujsauwai jintinkajtin ati tusa. Nuna dutikainakush juti múunta uchijinak pachikchau ainawai, ayatak takatan inainak papinash aújmitkakchau aiwai.

Nuni matsatai 1949, tatakura Cuesta, Saleguijâi âatus nagkamau ainawai íña uchi chimpimáatnun nagkamainak, nutik apachjâig igkunijmawai. Yamaish nuke ami uchita atumesh pêg kakajtajum tusankesh tatsujime, ayatak jutí nugke kakajâ ayamjukmi tusa chichamunun junash ujâjame. Nuigtushkam jûjú pachisa chichamunum titajame, yamai uchi apachi pujutin utsumakan shîij pujuschâinjâsh tusa nugkéen sujûktatus ânentaimainâish ainawai, nuni ânentaimuk nugkéen jinkî ukukî apachnum yunumak tsakak nina patañiish wajúk matsamnukita nuna kajímatunig nuni ainawai. Tijagki ame nunú

nuniakum pegkejan ânentáimkun junash juniatsjash tiipa, nuní ânentaimkumesh âjúmaish yapajinashtinaitkum, nusha wainka nuní wekayipa waínka yushiktái atasam nusha nuní ânentaim wekaetatme síij esesam ânentáimkau atá. Nâunchuk múuntaish juní ânentáim yujátun ashí dekapsau áinawai, nunikmau âig yamai uhití múunjuish nuní najâneákchamunmash wáinka nággamim pujútjun yapajíachâinjâsh takumesh yapajíashtinaitme duwi tajame.

Nâunchuk múuntai jímaj uchi tsanig chichainak: úi yatsujú âents ikam wekagás yupiajúi timau amí tusaj, ikam júnkíaj ñujag tsamakun yúwinak yujasaj, âentsu wainainak ewakmamak kakújkâjá pisa yujau, nunikaj núkap tsâwan yujainakush yupiakchau tuajame. Nunik tujigkaj chichainak –Ikám jiinki wekaekuish jêgá pujutik wainka yupiajtajai takuish yupimaitsui ayatak jêgá-jêgánmag ânentaimname” tuyi tuajame (Duik múun auj matsamu).

Nuwi júnak ujájame wainkam múun auj matsamui tusamek ânentáimtujaipa, junak inía uchi yamaikish metek, apachnum pachinkaj tsakainak apachmagajai tusa, tsakatuch pujusa yúu aajakmauchijinash nauchijin kaji-kajimatú, apachnum wekaekush pataichíjín wainkush igkug jutí chichamen aujsashtinun datsantin, apachjî najínash yapají, jutí uchichua nunin wâigkaj yujainawai, ame wainkam nuní wekáekumesh apachjái metekak achatnaitme, wajúk yapajínatajmeki ¿jutíish apach dijáu ainaj? Apach pujut waímatkau achakmek metek pukujchátnaitme, chichame shíij nékakmesh wíisha metek achâinjâsh takumesh apach wegantu ainau dakúntut igkuam achatnaíme. “Chaj wíitsu tsakatchitkun tsaagnash, baikuanash, datemdash ekeniaja taunush atak apachmagatnun waímatkachunuk apachmagatja túuk ânentaimchawaitjai” (Mikayu Shunta). Nuwi waínkam datsan nuní íwâinmamá wekayipa tusan ujájame. Nuwi tajame ñâunchuk jutí múunjig nugka âggannum matsamsaj shíij dakujú matsamianume nuní matsatun apach kautuawaj jutí pujutinash eméstujmaku ainawai.

Añumpa juna pachisan ujájam juna iniastajame ame ânentaimsamash ¿tikich pujut utsumakaish metekash ñâunchuk múun patañíjâisih ânenis matsamia nujáish metekash ânenáimainit?, ame ânentaimsam metekai, metek pujutash úmika wegaji tusa takumek ânentaim ichichiam ekemsamatúkta, dekaskash múun ânenis matsamia nujáish metekash ânenin ainaj, nuwi tajame ame ânentaimsamash:

- ¿Yamaish yáita uchijin jintâa aepsâwâ tsakapak, papí aújku weta tusa awemaush?

- ¿Yamaish yáa ñáunchuk múun jêgan jêgamak shíj iwa-iwajûs, aja ajamí tajîmat, nuwê nijâmach ñajátuam úmak patañijái untsunik âjámnayin âjâmia nunik pujaush?
- ¿Yamaish yáita kuntinun maa yuwakûsh patañijái untsunik akikchaun âjámnnainush?
- ¿Yamaish yáita tsâagku bushutuk washí ânentan, tagku ânentan, ñawâ ânentan unuimaj êgák yuwaush?
- ¿Yamaish yáita kakajam chichamtin, chichamesh yajuptushtâish?
- ¿Yamaish yaá uchía ñauchuk múun, múuntak-múuntak untsunikaj chichaman jintiajaj besetnash emayanum nuni ânentaimush?
- ¿Yamaish yáita yachí jakamtâi uchi bitaikan ñajûak, jintâa wetajum tusa chicha-chichajkâwâ tsakapau ajamia nuninush?
- ¿Yamaish yáita patañin chichamai pampantíajtaish ayámkajtak chichamnash pachîa chichaush?
- ¿Yamaish yáita yáchî jáak ijajmak tepetaish kuntinchin mantus ejetin âjâmia nutík ânentaimush?
- ¿Yamaish yáita kuntinchin egapak yuwakûsh shimpankaj tusa kuitamas yuu âjâmia nútikaush?
- ¿Yamaish yáa nuwâ ajajin shíj ipantuj êwê yuwaush?
- ¿Yaá múunta nuwê apatkash makichik jeganmag apujus inama yúu âjâmia núnik pujaush?.
- ¿Yamaish ñáuchuk múun katsuj nuwenin ajamia núninuk ainaj?
- ¿Ñáunchuk múun wáimakuitak, ânennash ûnuimajûitak pachimakchau âjâmia nuninuk aina yamai uchi papi ûnuimajush?

Júmamtin pachisa inimainuk kuwashtai, nuwi yamai inaitajame amesh ânentâimsata. Nugka agkan matsamtujmaun pachis étsejiitkush wagkan pachimjâsh jintíawa tusa titatme, añumpa núgkenchau jugakmak ashíj pujút yapajínak wegawai nuniakui yamai waítтанum, nugka yatsútjái sujítnayat, kuntinush egapasa yutâish, múun jintjâa wekaetin âjâmia nusha ashí tsuwapakji, imátjûamunmash tuwí uchish wégajag pujutnash níimajajtinme.

Pujút níimajchautinak disjûa yamai uchi wajukenawa, ashí fína nugke sujujá matsamsa ayamjúktinig apu anaitukâjê tusaj, auwai níina múunjî pujutin ânénu

tama wañak tawas tunatu najanamun juwakug taket atsejuk wi-wiñtjai tinu ainawai múun ânentaimtanash egkéajchau ainayatak, tikich âents ainau dijsátnume tusa. Nuigtushkam apach ainau, dita tsawánjî mamikiamu jegatai nunú nantsemjûami tusa tuwinakûi, 28 juriutin uchí-uchim ñumpuunka ñáunchuk.

Iwa iina múunjin kayanum utsâi âmúyi tuajame, ñajagken etíish âmu awajmatâi, Tseje jutí âentsun ayamjâk kaya wajajânum yaasun usuktúa, daekan nenan shíj papajâ umik nuwi yasun usuktúa, Iwa anagkuatnun yaas tuntukun juúk chakinchinum âimak Iwa matsatmaunum ejega chichak: “apachi amain yaas ñumintsak tsamaka wajame imanikun amimash yusa ðekapsatí tusan apáatsagchik takujkímjâme” tusa susam ñuwa, yumijtin ñumintskan dekapej, Iwa chichak -yajautsui tijâgki, minash kashin íwáintujkata yuwátjai tusa tama, -ayu apachi kashin ashi uchuchijmijâi minijum yuwatajum tusa tima, tsâwâinak ashi uchi-uchim chagkinchinak tsukapêasúa pujút ñumpunak shiyaku tuajame. Nunitâi Tsejeshkam usukâa umikú asâ kaya amain wajas, japachi ashi uchijmijâi utsánmek ejapenkum kaaampu!, kaaampu!, tita! tama Iwashkam ashi utsani ejapeantak ¡kaaampu, kaaampu! tuitâi daek nenanmaun metét tsupijkam pujít tsujîmakâj ¡uuukasúa buchig weajânum utsana jî nau tuajame.

Nunikmatâi Tsejeshkam dipas buchig chipajunum achimas akagak, namput iwaku amaitsui nunin mantûawâi tusa usukchijin juki jîuchijin usukia-usukia ¡waa, waa apachjúa! tusa buu-butkâwâ, dipas achimas akaikî diikma Iwa butsukeg kayanmag peét-pet wâigkâ atatman wainak, ashi-ashi niimaj iwaku atsutai ¡kusui tunau jinutpae! takug Iwa butsuke pemaj atatman juwakug dijaichijin pake-paket anujâ juwakug see ânentaijun umikjai tiu tuajame, dutík jukimu asâ Tseje butsukeg dukap apu tuajame (duik múun uj matsamu).

Jutik tsanujâ amumain apach ipaamamtâish shimutin ainawai, juniamush pégkejchawai tusankesh tatsujai, shíj âneasa ipaniamu akuig nusha túu pujumaisui, juka shíj ânentaimtusa dekamak jîjú tsawan etegkamun emematin aina juka, íi múunjinkesh ayamjûinak chichakmau tsâwanjiiigkesh jegatai tinu ainatsui, íina shiwají ainayatak “juti” nugkanum matsatui tusaj dita chichakmaunum juka jutik nijamchish umuttañai. Duwik múun Aujmatsamun ujaákmajim nunú ânentaimsajum dekatajum ðekas Iwáash aya juti múunta

amu ajakush? Yamai dekam jutí âents wegantunak t́kích âents ainau jití ikam matsamin ainautinak amupá ajakú ainawai. Nuigtushkam dekas apach ainau kaunainak juka kuintinjái metekai tusaj âents junin yujakai tusa jutí múunjinak kâjéen ajaku ainawai. Nunú aú-aújmatam shíj jintiasa dekachmin antukuitji, nuniku yamai uchi dekainak duwik múun aujmatasamu tinu ainawai.

Jutí shiwaj wéántutinak ashí tishipij, atumi múunjinak jutik amutjamkau ainawai tusajag tikích âentsuk ujakachatin ainawi. Duwi ñaunchuk múuntak “jintá kakajá wechautik patá mau wáñakuish beset iíkmakchatnutik ayatak tagkumattaña” tinu âjami, jumamtin yamaikish úna múunjin tutit awjú ajakmau tsawanjt́ jegakui ayatak emematin ainajt́. Jutí múunjig tsawantan mamikíawaj jôjû tsawantái nijâmanch úmutái afí tusajag chichamnak umikchau ainawai, ayatak ikam shiyakaj kuintinun êgâmak kaunawaj sutunash ijunaj umutnyá ajakú ainawai.

Ñaunchuk múun papi agatan unuímátjachuk dita wajt́ utujchatnak wainkau ainawa nuna agaj ukujtámkichunmag juti múun waitkasmaush dekámatsui, nuigtushkam apachish jutinash wajúk diijmasuk ainawa nusha shíj dekachuitji. Nunin âig yamai uchi jintias ânentaimainachu asaj dekaskets apachi pujutai imashij pegkejaita tuwinak pachittsau, shutuk epenkamunum makichik tugkae timu ewemtújchatin wekagama nunin yujau waigkaje. Atumek chichamash imatiksajmesh jintiasjum dekatsjume yáa pata wegantuk papinum agajash iwáintujmakti. Dekas papi agau aina nunú juti múunnash waitka ajaku ainawai, nunin asaj dita múunji takamsamujinak úwínak juti âentsun pachis agákmau yamaikish aujin áame, nushakam ashí waintsuji t́kích chichamai agaka íwíinajmau asamtái, nuwi yamai ujaktajame.

Yamaipat 1970 wampushtin, t́kích âents kaunawaj matsamas múun kakajam ainau matsami nuninun, tatakura aidau Díipa nuwí matsamas Awajún ñañajt́ tusaj jutí múunji najin anajmas numi dakatáin jukí itawaj, yamai Awajún múun ainau tâwaj natsemjûatnume dita takajmastinjít ainaunak ikamjukan itajûawagjái tusá anagkuam, ñaunchuk Tseje Iwan yasua usuktúa unumpijû tuajama numamtin múun ainau âjâmi:

Achañap, Pascuaj, Datikiri, Manunse, Mashian, Mashigkash, Chuu, Juwag nuwi tikích ainau ¡chaj! kakajam atsukianum imannash âjântutsuk, yamai yakat *pueblo jóven Juan Velasco Alvarado* tuwina nuka ñaunchuk múun Kuji ayi nunú t́kích âents ainaujái Urutagkan (Roldan) timujin takajuinak numi múunnak amukú ainawai nunú asauk numi kampujskamu ayi, imannum múuntan etsanun j́ijaj íjûmaj nantsemtikainak, pirutnash wasujátajum tusa nuní múuntan ânentain ikajtukaj tsanu matsamin âjâmi. Nuna yamai ¡chaj! atumi múunjít najin juki itawaitji, nutikamun múunjum j́ínak juna ukujtamkiuwai tusa, ¿yamaikish íwaintamak aji?”,

jutik uchita ñaunchuk múun kakajam ainaunash âjantukchau ainawai nuka yamaikish nunisagke. Duwi kakáagjum papi aujsajum wajî waimataitkuish waimaktajum wainka tsanuam yujajum tusa ujamash ayatak yúnutuinawai.

Âantsag tikichnashkam ujaktajime anu Diip iñaka awig 1964, wampushtinchakam tatakura wegantuuk awajunin apach kasajûinak waitkaina nunú ayamjâjî tusaj kura Puerta ayi nunú Awajuni wâjî sumatâi atí tusa nunashkam nuní anajmas, dekas awajúnnauskaita tumainun wâjî sûtûtain *“Cooperativa aguaruna jebe”* [ACJ] jûnak nagkamawajûi múun Cerbantes Longinote Díaz (iníayita nuní najtin ayi), Cristúa (Cristobal), Tupiká, Torre áátus juti áentsun inaj jêga múuntan téjía jêgamkamunum wâjîfê bete piyaku ayi. Nuna sûtûktinun Aripíu Jîman égkeu ainawai ame wajî sûtjin ata tusa anagkuam sujâk pujuyi. Dutikamuñnum juti múunjî, Dípa nujinchinia, majanunmaña, senepa nujinchinia, tikich namaknumia ainauk ñugkípki duwapen, paki duwapen, ikamñawan duwapen, uñu duwapen; shijígnak ikaunmawaj sûtjâinak wâjînak japjî-pikî sumayanume, nusha dekachmawai ¿nuna sujâinak kuwichkin ñajûmianum nunash itujkauts ainawa?, nusha yamaikish dekachmawai. Nutík Aripíu sûtjû pujaun tikich kurajâi takau Dr. Daniel Gubian Hechebarría najtin ayí nunu tâá wâjî imatika sûtjâmun wainak, nuigtushkam Aripíu nuna sûtjâk waitú pujutai, chichájâk ¿aminash wajûpa jûjû wâjî sûtjâmunmash akíjmainawa? tusa tama, minak jûjû sujâkum pataim ñaigtá tujutiajmatâi sujakun pujûjai tusa Gubiankan újâi tûjûti timayi:

Aripíu juka jutík takaji tusaikish tichamui, ame jûjû takamunum kuwíchik jukítñujmek nuusha papi umikmau jûjû awajama tusa inaktujamtâi- nuna dekan kura chichajkun mimash wajûk akigjume tusa tâi, kura chichajtak: aminash yâa tsanujmakuiña jusha inime, amesh túu-tutak pujum tûjûtijâmi. Nuna shúij takatasa pujâi dekâjtûawainum tutsayanumtai núninak yapajtuau aninawai. Nuigtushkam San José tutâi awai tséasim wakáttak nuwísh wákean wajûpa kura tagkúmkachu ainawa nunakésh jutí múuntak dekáchu ainawai wajûk takasuts âjâmia (Alipio Jima; igkua aujâi juna etséjmayi 1999).

Nutík takáa pujau cura Gonzalo Puerta ayi nunú 1968 wampushtin jakámtâi¹. Núwî cura Francisco Rodriguez jugatuk takáa pujau nushakam jáak ukukúwai.

Nuwi nagkamas wajî sûtjûtainak najîñ yapájtúinak anaikajûi SAIPE. Nutikainak Aripíun jînak Castillo Reategui (Datikiri), ame yamai sujûkta tusa

1 Padre Puerta Gonzales tutâi jutí uchtí pumpuku ayi nunú jakauwai 1968 nunikmatâi ukusajû ainawai iglesia Santa María de Nieva.

apujksam nushakam sujâk pujuyi, nutik anajmas kura dita wajijin sujin ajami. Nuní matsatun 1972 wampushtin nagkamas múun Juan Velasco apu egkema ashi tishipij emak kura takat sutainash epetiuwai, nuigtushkam uchi jintintâin chichamjinnash ashi tsupiak NEC (Núcleo Educativo Comunal) najanak émak Âentsnashkam yapajkauwai nutikam shimak Castichuchinak tikich takatan anagkuawaj wainak inaisajûi, dutikamu yamai municipiu egkema jinta japimin pjuuwai.

Junak ujajime atumesh dekau atinme tusan. Ñaunchuk nugka agkantunum matsamsaik wainka ík pempeentuniki tsanuníjchamui nuniku áig jutí múunta tsanuinak nutikin ájâmi tusan jintiasan ujajime.

Juna jintiasan jutí múunnash wajúk tsanujûuk ájâmi nuna ujajim nuni ánentaimkau ainau, yamaikish matsamas apu waipaktinme atumin múunjûmesh wajukuk ájâmi dutiksajmek iwájmamkatajum tujamkujâi ánentaimkats nuní íwâinmamku pégkejnats íwâímamja tutuñai tujash tikima nutikamak amaitsui yamaya jûwîg.

Titajime ¿Nuniasajash nagkanainakush ipaamak patâa ainaujâi ijûntsa sutu úmutiama nuninuk aina? ;jatsa! junak ayatak wajuk ñaunchkesh dita múunjîsh iwajmamnuuk ájâmi nuna yamai íwâinkatnume tusâ tujamainakûi nuninaitji. Juna juniaknuts shíj mina patajun pujutin íwâínaja tusaish nuni ánentaimaitsui, nunú nuniakuik iikish éme ánentaitumaku nuní wekaechatâi, waínka dakumkajtú wekaekuik yushiktâi atatji.

Nuigtushkam apu ainau uchi papi aujtâin jegamjuktajame, wâjîinkesh amastajime tusâ múunta ijûmaj nantsémtikin ainawai, nunú ánentaiyai ipam wekaemaitsui. Apach tsanupainak jutík anagtama chichajtaish juti uchi detseuch yujasaj, wíi íwâímkatjai nuniakun kuwichkin jukichainjâsh tusajash ashi dekapmamsa yujainash ainawai. Ame papi aujsawaitkum múunjum jintiasa ujatsuk ameaske pataim pempentukim anagkuam apachnum utsaam múun kitakai waitkamaitsume nunúka tikima jutí múunjig dutikaik waitka wekaemaitsui.

Juna taja junak, jusha junimatsui tusankesh tatsujime, ayatak ujajime wainkaik wásu-wasujkamtâjâig nunishtaña, ñaunchuk múun wâjîu matsamas iwajmamá ajakmauk, múun jinta wekaetusu usuimitkâjtsaigkik wainka ánenjakats juki wasujkam wekaemaitsu, jutí shiwajash éme ánentaimtinaitkumek. Nuniachkumek amek pempentumakim busamame, nuní wekaenutinak ajûmai uchi tsakainak múun wekaga áu wainak tsanum wekaetsuaya tusa datsan ipatarka yushikiam wekaetaña tuajame. Ñaunchuk múun nuní ajakun, yamai uchi wajupa pachis yushikchau ainawa ame tama wekaemaitsume añumpa.

Dekas iina múunjĩ matsamia nunú aujmatkuik jutí shiwaj, achuar, wampis, shawi, chapra, kantuash wegantu aina nujái ñjúnjâ ânenjakats, juti múunjĩg juni matsamin âjami tusa chichaku, dita âentsush wâjîntuk chichakaag matsatua, wajúk tsuwamauk ainawa, wajúk kuntinchinash êgapauk ainawa, nugkanash wajúk akasmatainawaki nunú jintiasa chichamainitji. Juti múunjĩ maniu ainakuish yamaik nunikchami, ñjuntsa matsamsa iish chichaka depetmamka matsamsami, tusa ânenjakats ditajái ichishmamjá chichamainitji. Wainka apach ânentaimain aina nunitsuk, nuigtushkam apachits yacha asâ tuwinawa tusa wainka yunum wekaemait sui kuwíchkiuchijí yunuúmjaku.

Jutik-jutik matsamsaik amek dekachuitme, wâgkag juní matsamnush ainawa, itujsanuk wajijin kasajkaj tusaik nunú ânentaiyai juti shiwaj wêgantutik niníshchamui. Untsu apach ainaw jutí pujutin disaj wâgkag jûninush ainawa tusa ashi ejegaj dijatin ainawai, nuwi tajame ii tsumainuch ainakuish imanuk pachitnaijaik ânentaimtunijaik niníchuitji ayatak itujsaik juti nugke ayamjuka ñaunchuk iina núunji chichaman antakats matsamia nuní matsamsaj tusa nunú ima senchi pampanjî. Untsu jûjû taji jûna apach ainaush antujtamchakuig beset tepeatnutskaitai tajai, ñaunchuk múuntaish, múunji beset emachmaunmash uchijí jintâa yujainau patañi mantamash besetnash ema ajaku ainawai, nuwi tajai ajumaish chichamak tepeatnaî, duwi ames êemtiksa dekau atá, atak chichamai maniakum utujiam âim.

Añumpa ajûmaish fina shiwajig juna aujus wainainakush dekaske, Awajúnna dutik tsanú ajaku ainawai tusagkesh tichatin ainawai, íi uchikesh jinta kakantuj wekaetachuk tishipij ânentaimas dekashtin ainawai. Tujash betebetek achatía nuninuts ajûmaish uchinash ânentain ishitujtin ainatai, nunca kâkâas depetmamainak ajûmai iwanchnumash chichaman iwáktin ainatai. Wajupa wampush nagkaemakiuwaita, jutí waitkasmaush imanisag tsawan nagkaemaktinai juti uchi chichamai maniamush, mesetak waamak emachtaña, dekas juti múunji waitkasu betek ejesa metsét emachkuish nuna patañi uchijîsh, tijajîsh atsutnashit nunu diwinash umiktin ainawai. Múun tuajame “mantuash wajúk wetin pata ashi ñajumchatía pujusan antu pujutjai” tusa chichamkmauk ajumaish chichamnak kajimatu ajaku ainatsui nuninak besetnash emá ajaku aniawai, nuwi nuna pachisan uajame peg kakajum jinta âinjata nuniakam fina nugke uchijuish ayámjûka paan wetaitkuish wêgaku uchijuish ukujkítin amí.